

Motivar persunas rumantschas da returnar en la professiun da magister/-ra

■ **I dat anc adina ina mancanza da magisters e magistras. La Scuola auta da pedagogia promova il return en la professiun.** Cusseglis da scola dal Grischun èn obligads d'occupar plazzas libras. La mancanza da magisters na sa mussa perquai betg da maniera uschè evidenta tar las plazzas avertas. Ella sa zuppa plitost davos qualificaziuns manglusas d'ina part dal personal.

Situaziun pli acuta

Sin il stgalim secundar manca il diplom correspondent tar radund 20% da las persunas ch'instrueschan. Ina situaziun sumeglianta è da constatar en il sectur da la pedagogia curativa. En vischnancas rumantschas mancan las persunas qualificadas cun rumantsch sco lingua materna. Ed en la scola primara èsi difficil d'occupar plazzas en vischnancas pitschnas e periferas. Questa situaziun n'è betg nova. Ella è dentant daventada pli acuta.

La Scuola auta da pedagogia dal Grischun planisescha uss in curs per persunas che vulan turnar en la professiun. «Nus ans vulain drizzar cun intenziun a persunas che han gia in diplom d'instrucziun», di *Luzi Meyer*, manader da la partiziun furmaziun cuntinuada da la Scuola auta da pedagogia dal Grischun. Questas persunas hajan bunas qualificaziuns, ellas hajan dentant forsà tema da turnar en la pratica. «Igl ha propi dà bleras midadas ils davos 10 fin 15 onns»,



conceda Luzi Meyer. Perquai è l'accent da ses curs sin las innovaziuns actualas.

A partir da l'onn da scola 2012/13

Cun sis occurrenz dal suentermezdi e da la saira a l'entschatta dal 2012 duain anteriuras persunas d'instrucziun survegnir las actualisaziuns necessarias en ils secturs dal plan d'instrucziun, dals meds d'in-

strucziun e dals concepts didactics ils pli novs. Uschia fissan questas persunas ablas da s'annunziar per plazzas la primavaira proxima e d'instruir gia a partir da l'onn da scola 2012/13. Plinavant pon ellas vegnir accompagnadas d'ina supervisiun durant ils emprims mais da lur activitad.

Il curs per persunas che vulan returnar en la professiun èn ina mesura actuala da

la Scuola auta da pedagogia encunter la mancanza da magisters e magistras. Ulteruras mesiras che pertutgan la mancanza da magistraglia sin il stgalim secundar vegnan actualmain discutadas tranter las autoritads da scola e la scola auta.

Reinhard Kramm

Infos sin www.phgr/wiedereinstieg.ch